

**ODLUKA O IZMJENAMA I DOPUNAMA ODLUKE O UVJETIMA I POSTUPKU OSTVARIVANJA
PRAVA NA OSLOBAĐANJE OD PLAĆANJA UVOZNIH I IZVOZNIH DAŽBINA**

Član 1.

U Odluci o uvjetima i postupku ostvarivanja prava na oslobađanje od plaćanja uvoznih i izvoznih dažbina (Službeni glasnik BiH, broj: 24/18) u članu 6. dodaje se novi stav 2. koji glasi:
„Od plaćanja uvoznih dažbina oslobađaju se i dijelovi i standardni dijelovi opreme iz stava 1. ovog člana.“

U istom članu, u stavu 2. koji postaje stav 3. iza riječi „Oprema“ dodaje se zarez i riječi „dijelovi i standardni dijelovi“. U istom stavu, riječ „puštena“ mijenja se rječju „pušteni“. U istom stavu, riječi „ne može“ mijenjaju se riječima „ne mogu“.

U istom članu, u stavu 3. koji postaje stav 4. iza riječi „Oprema“ dodaje se zarez i riječi „dijelovi i standardni dijelovi“. U istom stavu, riječ „puštena“ mijenja se rječju „pušteni“. U istom stavu, riječi „s kojom“ mijenjaju se riječima „s kojima“, riječ „podliježe“ mijenja se rječju „podliježu“.

Član 2.

U članu 7. u stavu 1. iza riječi „opremu“ dodaje se zarez i riječi „dijelove i standardne dijelove“, iza riječi oprema dodaje se zarez i riječi „dijelovi i standardni dijelovi“.

U istom članu i stavu, u tački a), iza riječi „opremu“ dodaje se zarez i riječi „dijelove i standardne dijelove“. Ostali dio teksta se nastavlja.

U istom članu i stavu, u tački b) iza riječi „opreme“ dodaje se zarez i riječi „dijelova i standardnih dijelova“. Iza riječi „opremu“ dodaje se zarez i riječi „dijelove i standardne dijelove“. Ostali dio teksta se nastavlja.

U istom članu i stavu, u tački c) iza riječi „oprema“ dodaje se zarez i riječi „dijelovi i standardni dijelovi“. Ostali dio teksta se nastavlja.

U istom članu i stavu, u tački d) iza riječi „opreme“ dodaje se zarez i riječi „dijelova i standardnih dijelova“. Ostali dio teksta se nastavlja.

Član 3.

Ova odluka stupa na snagu osmog dana od dana objavljivanja u "Službenom glasniku BiH".

Obrazloženje

U Službenom glasniku BiH, broj: 24/18, od 17.04.2018. godine objavljena je Odluka o uvjetima i postupku ostvarivanja prava na oslobođanje od plaćanja uvoznih i izvoznih dažbina. Članom 6. navedene Odluke od plaćanja uvoznih dažbina oslobađa se oprema za proizvodnju koja se ne proizvodi u Bosni i Hercegovini, koja se uvozi za novu ili proširenje postojeće proizvodnje, modernizaciju proizvodnje, uvođenje nove odnosno osuvremenjenje postojeće proizvodne tehnologije, a kojom se obavlja neposredna proizvodna djelatnost.

S tim u vezi, neophodno je izmijeniti član 6. Odluke na način da se od plaćanja uvoznih dažbina oslobode i dijelovi opreme, odnosno mašina iz stava 1., a razloge za to navest ćemo u nastavku.

Obzirom da je riječ o mašinama koje se ne proizvode u Bosni i Hercegovini i da se najveći broj dijelova za te mašine ne proizvodi u Bosni i Hercegovini, ili se ne mogu naći originalni dijelovi, treba primjeniti istu analogiju, odnosno ako se može mašina osloboditi od plaćanja uvoznih dažbina, može i dio opreme. Proklamacija svih nosioca vlasti na svim nivoima je da se mora modernizovati proizvodnja i da se moraju unaprijediti tehnološki procesi u privredi. Naša predložena mjera je u skladu s tim.

Usvajanjem naše inicijative povećala bi se konkurentnost bh privrednika, povećao bi se izvoz, jer bi se moglo odgovoriti potrebama Evropskog tržišta. Ujedno bi došlo do povećanja ekonomskog rasta.

Eventualni gubitak u Budžetu koji bi mogao nastati zbog neubiranja uvoznih dažbina na dijelove višestruko bi se nadoknadio kroz naplatu PDV-a na proizvode i usluge.

Na kraju navodimo da je pojava korona virusa negativno utjecala na poslovanje i dovela do gašenja mnogih kompanija i otpuštanja radnika. Bosna i Hercegovina je jedina država u Evropi koja nije preduzela niti jednu mjeru na nacionalnom nivou kojom se pomaže privredi da prebrodi ekonomsku krizu. Shodno navedenom, molimo vas da razmotrite prijedlog da se uvoznih dažbina, pored opreme, oslobode i dijelovi, odnosno standardni dijelovi, te na taj način date svoj doprinos rasterećenju bh privrede.

Napomena: Ukoliko se usvoji naš prijedlog neophodno je izmijeniti i ostale članove Odluke u dijelovima na koje se odnosi predložena izmjena.